

IS ARRÈGULAS DE SA CUMPANGIA DE IS BARRACELLUS

Aprovau cun deliberatzioni de su consillu comunali n. 65
de su 20 de mesi de idas de su 2010

ART. 1 Cumpositzioni e ordinamentu de sa cumpangia de is Barracellus

Est constitua in su comunu de Mara sa cumpangia de is Barracellus cun sedi de lei in su comunu etotu, in bia Nazionale n. 49, cuncordada e arregulada cunforma a is inditus de sa lei sarda n. 25 de su 15 de làmpadas de su 1988 e a is normas de custu arregulàriu.

Su nasci de sa cumpangia de is Barracellus e a ndi pinnigai a is cumponentis suos funt in s'arrespetu de is printzìpius de su voluntariu.

ART. 2 Nascimenta e durada de sa cumpangia de is Barracellus

Sa cumpangia de is Barracellus nascit in su tretu de tempus intra su primu de mesi de ladàmini e su trentunu de mesi de idas, s'incàrrigu durat tres annus e est cunfirmu po àterus tres annus, in otomàticu, chi ses mesis innantis de s'acabu normali no detzidint de no dda torrai a cunfirmu o su comunu deliberat àtera cosa.

Comentisiat, chi su comunu e sa cumpangia espressant sa pròpiu voluntadi, fait a transiri s'incàrrigu finsas a intrai in servìtziu sa cumpangia noa.

ART. 3 Funtzionis ordinàrias de sa cumpangia de is Barracellus

Sa cumpangia de is Barracellus depit ponni infatu a is punnas de chi ddis donat s'art. 2 de sa L.R. n. 25 de su 15 de làmpadas de su 1988, e prus de totu depit:

1. Defensai is propiedadis chi is meris assigurus ddis ant donau a càstiu, paghendi unu tanti cunforma a is normas de custu arregulàriu;
2. Agiudai, chi si-ddu pedint, a is autoridadis chi tenint sa punna istituzionali de
 - Protetzioni tzivili;
 - Cumbati e brocai sa fura de su bestiàmini;
3. Cumbati e brocai is infratzionis chi previdit su D.L. vo n. 22/97 (Decreto Ronchi) po su chi est su billai su scàrrigu de is arrefudus tzivilis e industrialis e sa lassada de is arrefudus in is àrias pùbricas;
4. Agiudai a is àterus entis statalis e istituzinalis sardus chi faint faina de billai e defensa in custus campus:

- Defensa de is padentis, de su sartu e de is terras traballadas;
 - Defensa de is arrius, finas po depit cumbati s'impeamentu;
 - Defensa de is parcus, de is àrias vinculadas e protègias, matas e totu su chi est sienda naturali, in generali;
 - Cassa e pisca
 - A cumbati e a brocai is fogus.
5. Defensa de sa sienda comunali, logus aforas de bidda, àinturu de bidda, e finas a aministrai is benis de 'imperu tzivicu' e de 'demàniu armentìtziu', cunforma a is maneras chi stabilessint is cunventzionis de cussus.

Totu is àteras funtzionis, a tempus, chi s'aministratzioni comunali pensat de podi donai a sa cumpangia de is Barracellus po is fainas suas, a nòmini e po s'interessu de su comunu cunforma a is cumpetèntzias chi ddi donant is normas de oi. Custas funtzionis ddas scerant e ddas donant cun d-una delìbera de sa Giunta Comunali, chi stabilessit comentis ddas depint fai e po cantu tempus.

Is cumpentis de sa cumpangia de is Barracellus, a prus de is fainas chi ddi donant is istituzionis, depint agiudai, cunforma a su traballu insoru e arrespetendi totu is normas de oi, cun sa Pulima, chi si-ddu pedit su sindigu po cosa pretzisa, o is autaridadis cumpetentis.

Sa cumpangia de is Barracellus depit fai arrespetai is ordinàntzias e is arregulàrius comunalis de cumpetèntzia in is matèrias chi eus nau innantis.

In su fai custas fainas depit ponni a su primu postu, assumancu candu fait, su prevenimentu.

ART. 4 Is cumpentis de sa cumpangia de is Barracellu

Su nùmeru totali de is cumpentis de sa cumpangia de is Barracellus, e finas su nùmeru de is ofitzialis e de is graduus, cunforma a sa mannària e sa calidadi de su terrinu, e a sa messarìtzia o su pastoriu de su comunu, no podit essi prus pagu de 10 o prus mannu de 50. S'arrelata intra is cumpentis de sa cumpangia e is ofitzialis, foras chi siat su Segretàriu, est stabilèssiu in sa mesura de 2 a 12.

ART. 5 Calidadis de tenni po essi nomenaus in sa cumpangia de is Barracellus

Po podi intrai in sa cumpangia de is Barracellus, tocat a tenni custas calidadis:

- a) a essi magiorennis;
- b) a podi gosai de is deretus tzivilis e polìticus;
- c) a no nd'ai pigau cundenna a presoni po 'delitto non colposo' e a no ai patèsciu 'misura di prevenzione';
- d) a no essi stètiu bogau de is fortzas armadas o de cumpangias militaris o bogau de ofitzius pùbricus;
- e) a essi acabau sa scola de s'òbrigu, deghinou a fai a biri ca est bonu a ligi e a scriri;
- f) abilèntzia fisica;
- g) a si podi impinniai chentza de strobu;
- h) a biri in su comunu de Mara de 5 annu assumancu.

Sa de crarada de sa lìtera 'e' de innantis, bolit fata cun d-una de crarada firmada de s'interessau in presèntzia de s'arrepresentanti de lei de s'enti e de su segretàriu, e tocat a dda intregai ainturu de dexi diis chi dd'ant nomenau.

De totu custu fait a ndi fai de mancu chi s'interessau at giai fatu parti a sa cumpangia de is Barracellus po assumancu tres annus, o cinu chi est proponendi-sì po s'incàrrigu de Capitanu.

Is ofizialis e is graduas, a prus de totu is cosas de su primu coma de custu articulu, depint:

- a) Ai lòmpiu is 25 annus;
- b) Tenni sperièntzia connota de su logu de su Comunu de Mara;
- c) Tenni sa patenti B.

No podint fai parti a sa cumpangia de is Barracellus, mancai tengant totu is cosas de su primu coma de custu articulu, is chi ant giai fatu parti de sa cumpangia e no dd'apant torrau is contus a s'acabu stabilèssiu o apant abusau de su dinai o nci-ddus apant bogaus o ndi-ddis apant tirau s'incàrrigu.

Chi unu tenit incàrrigu in sa cumponenti de sa cumpangia de is Barracellus, no ndi podit tenni in su Consillu Comunali de Mara.

Is Barracellus no podint, chentza de un'arrexoni pretzisa, fai de mancu de fai sa faina chi ddis spetat.

Chi est, e pròpiu no fait, su Capitanu, apustis chi at averiguau issu etotu, podit donai sa dispensa de su servìtziu.

Is Barracellus no si-ndi podint pigai, de peruna manera, sa libertadi de assumi genti a ddus agiudai e ni de ndi fai pigai su postu insoru a àtera genti, mancai siat po pagu tempus.

Is Barracellus chi funt in servìtziu depint portai sèmpiri su distintivu e sa patenti, cunforma a s'art. 13, coma 6 L.R. 25/88.

Candu funt in servìtziu depint tenni sèmpiri cudda dinnidadi e curretesa de is òminis chi funt traballendi in is servìtzis pùbricus, e depint portai sa divisa sèmpiri beni limpia e ordinada.

De totu su furnimentu tènnicu de is divisas, tocat a torrai contu a su comunu dònna annu, innui si depit biri sa còmpora de su furnimentu etotu e s'intregu a is Barracellus, cunforma a is inditus de s'assessorau regionali po comporai is ainas, e chi is contributus no podint essi partzius intra is Barracellus etotu.

ART. 6 Critèrius de preferèntzia de is Barracellus

Is calidadis de preferèntzia po sa nòmna de is Barracellus, funt in custu òrdini:

1. a essi fatu parti de àteras cumpangias;
2. abilidadi e capassidadi de is interessaus a fai is fainas de s'art. 2 della L.R. 15 de làmpadas de su 1988 n. 25;
3. a connosci su logu;
4. a essi meri de benis tutelaus.

Totu is cumponentis de sa cumpangia si depint podi pigai s'impìnniu po mesu de una de crarada in logu de s'àutu de notoriedadi anca dònna Barracellu depit de crarai cali funt is benis suus, e chi depint balli assumancu 1.500 èurus (millecincuxentus).

Sa giunta comunali, de acòrdiu cun su Capitanu, sterrit s'elencu de is cumponentis de sa Cumpangia e ddu presentat a su Consillu Comunali po ddu depi aprovai.

ART. 7 Comenti tocat a fai po ndi pesai sa Cumpangia de is Barracellus

Po sciri comenti tocat a fai po ndi pesai sa Cumpangia dei is Barracellus, abisòngiat a ponni infatu a su chi nant is artìculus 12 e 13 de sa L.R. de su 15 de mesi de argiolas de su 1988 n. 25.

Comenti est nascendi sa Cumpangia, po mesu de una deliberatzioni de fai a scrutiniu segretu e a majoria cumpria de avotus, su consillu comunali nòminat a su capitanu.

Sa nòmina formali balit bàsciu sa comunicatzioni de sa prefetura, chi narat ca nci est totu su chi serbit po podi donai su tìtulu de agenti de siguresa pùbrica.

Comenti nd'arribat custa comunicatzioni, su s'indigu nominat a su capitanu, chi depit fai giura ananti de su pretori chi tenit cumpetèntzia de su logu, cunforma a sa manera chi narat sa lei chi nci teneus imoi.

In is trinta diis infatu de sa nòmina, sa giunta comunali de acòrdiu cun su capitanu, sterrit totu is nòminis de is cumponentis de sa cumpangia de is Barracellus, po dda depi aprovai su consillu, chi aprimu averìguat chi ddoi siat totu su chi abisòngiat po dònna cumponenti, e agoa ndi delìberat sa costitutzioni.

Su s'indigu depit torrai sceda a su pòpulu, faendi pubricidadi a sa cosa, narendi ca est nàscia sa cumpangia de is Barracellus.

A is ofizialis e a is graduus ddu eligint a majoria e a scrutiniu segretu de totu is cumponentis de sa cumpangia, chi po custa ocasioni etanti at a essi ghiada de su s'indigu, impari cun su segretàriu chi depit sterri su verbali puru.

Chi est, e sa cumpangia dda cunfirmant po àterus tres annus, su consillu comunali depit nominai a su capitanu nou, scerendi in mesu de tres nòminis propositus de is Barracellus etotu, a scrutiniu segretu.

ART. 8 Domu de sa cumpangia de is Barracellus

Sa domu de sa cumpangia de is Barracellus est in su comunu de Mara o in àteru logu adatu de su comunu etotu.

ARTI. 9 Intrada in servìtziu

S'intrada in servìtziu de is cumponentis de sa cumpangia de is Barracellus balit bàsciu s'intregu de sa prefetura cumpetenti de su logu, de su tìtulu de agenti de siguresa pùbrica, cunforma a s'art. 12 de su decretu de su Presidenti de sa Repùbrica de su 19 de làmpadas de su 1979, n. 348.

Chi nc'amancat custa, sa nòmina de Barracellu no balit. In su decretu de sa prefetura, po sa nòmina a agenti de siguresa pùbrica, ddoi depit essi, cunforma a s'art. 12, segundu coma, de su decretu de su Presidenti de sa Repùbrica de su 19 de làmpadas de su 1979, n. 348, sa calidadi de is armas chi is Barracellus podint portai in su fai is servìtzius chi ddis ant donau.

Ainturu de is dexi diis infatu de s'arribu de sa noda chi donat su titulu de agenti de siguresa pùbrica, dònna cumponenti de sa cumpangia de is barracellus, depit fai giura cunforma a sa manera chi stabilessint is leis chi nci teneus imoi, ananti de su s'indigu, chi, comenti nci acabant de fai giura, fait s'àutu formali po intrai sa Cumpangia a is fainas suas.

Cun s'àutu de intrada in servìtziu, incumentzant is tres annus de is fainas de sa cumpangia cun totu is cosas e is arrespunsabilidadi de cussa.

Dònna cumponenti at a arriciri una patenti firmada de su s'indigu, de sa genia e cun sa manera chi at a stabilessi su decretu de s'Assessori regionali cumpetenti po su chi est pulima de su logu. Custu decretu etotu, stabilessit finas comenti depint essi is distintivus de connoscimentu e is gradus de is Barracellus, e s'òbrigu e sa manera de ddus imperai.

Is cumponentis de is Barracellus chi si funt mortus o dimìtius o bogaus cunforma a s'artìculu 24 de innoi, podint essi arremprasaus cunforma a is maneras inditadas in custa lei e durant finsas a s'acabu de is tres annus.

ART. 10 Su cumandanti de sa cumpangia de is Barracellus, ita tenit e ita fait

Sa cumpangia de is Barracellus tenit unu Capitanu chi dda arrapresentat, dda ghiat e est arrespunsàbili ananti de su s'indigu de su fai beni totu is fainas, de s'òrdini e de s'impreu tènnicu de is Barracellus. Su Capitanu depit formai is patùllias e ddas depit billai, s'assentat is permissus, candu nc'amancat calincunu, is fartas a sa disciplina, is punitzionis, torrendi a nai totu a su segretàriu de sa Cumpangia po si depi assentai totu in s'arregistru de su personali.

Po ddu nomenai Capitanu, a prus de totu is calidadi de s'artìculu 5, su primu e su de tres comas, depit finsas tenni custas cosas:

1. depit tenni 25 annus;
2. depit essi fatu parti de una cumpangia assumancu cincu annus o depit ai fatu servìtziu, s'empiri cincu annus, comenti a sutofitziali o ofitziali de Pulima, de Finàntzia, de is Carabineris o de sa Municipali.;
3. depit tenni sperièntzia connota de su logu anca depit traballai sa Cumpangia de is Barracellus.

Sa Cumpangia billat, cun is trumas suas, adedii e adenoti, sa costa, su sartu, sa bidde, partzendi-si in patùllias. Su Capitanu format is trumas, ddas ghiat e chi serbit, ndi podit pigai unu tanti de barracellus a dònna ora, po fai faina de servìtziu straordinàriu. Su Capitanu depit castiai a biri comenti est andendi su servìtziu e assigurai sa billa po mesu de turnus de spriculitamentu sighius e obrigatòrius.

Su Capitanu est obrigau a cambiai fatu fatu is Barracellus in is logus de billa.

Chi nc'amancat su Capitanu, no podit o nci dd'apant bogau o suspèndiu, si-ddoi ponit s'ofitziali prus bèciu.

ART. 11 NÒMINA E FAINAS DE SU SEGRETÀRIU

Po depi fai is fainas tènnicas, amministrativas e de is contus, sa Cumpangia de is Barracellus tenit unu segretàriu nominau de sa Giunta Comunali cunforma a una deliberatzioni de sa Cumpangia de is Barracellus, sceberau intra is cumponentis chi tengant su diploma de is superioris.

Chi nisciunus in mesu de is cumponentis de sa Cumpangia de is Barracellus tenit custu tìtulu, insandus su Segretàriu ddu podint scerai aforas de sa Cumpangia.

Su Segretàriu depit pigai parti a is boddeus de sa Cumpangia de is Barracellus, sterrendi totu is verbalis de cussus, depit fai e scriri totu is contus, ca ndi tenit s'arresponsabilidadadi po ddus fai beni e allogai.

Su Segretàriu tenit sa gestioni de unu fundu càscia po is spesas piticheddadas de s'amministratzioni de dònna dii, po unu tanti de 1.000 € (est a nai milli èurus).

Su fundu depit essi manigiau diaici:

1. ant a fai unu mandau de anticipu de 1000 € (milli èurus) in favori de su Segretàriu de sa Cumpangia;
2. custu dinai ddu depit allogai su Segretàriu etotu;
3. is pagamentas deretas tocat a ddas fai po mesu de 'bonus' firmaus de su Capitanu de sa Cumpangia e de su Segretàriu. Dònna pagamenta no podit essi prus de 200 € (duxentus èurus);
4. de custas pagamentas tocat presentai is contus a su Capitanu de sa Cumpangia e dònna borta su Segretàriu nci depit torrai a ponni su pròpiu tanti pighendi-nde-ddu de is fundus de sa càscia;
5. totu su dinai manigiau po mesu de sa càscia, su Segretàriu ddu depit assentai in s'arregistru de is entradas e de is bessidas.

In su traballu suu su Segretàriu podit essi agiudau de unu Barracellu, o prus de unu puru, sceberaus de sa Cumpangia e chi depint fai oràriu de ofitziu cuncordendi-ddu cun su Capitanu.

Su tanti de stipèndiu chi ddi tocat a su Segretàriu est stabilèssiu in s'àutu de sa nòmina e depit essi cunforma a su stobu de su traballu fatu e a su godàngiu de sa Cumpangia de is Barracellus.

Su Segretàriu no podit manigiai, nimancu po pagu tempus, su dinai de sa Cumpangia po su torracontu suu.

Su Sìndigu, cunforma a sa norma de s'art 17, coma 8, de sa L. R. 15/07/1988 n. 25, podit fai pagai una penali de su 50%de su dinai chi arresurtat in càscia ma chi no ddoi est, ca no nci-ddu ant postu.

Art. 12 Contus e Amministratzioni

Su manìgiu de su dinai de sa Cumpangia de is Barracellus, bolit fatu po mesu de su bilantzu de s'annu, cunforma a sa càscia, chi printzìpiat de sa primu dii de servìtziu de sa Cumpangia de is Barracellus.

Su manìgiu de su dinai de sa Cumpangia de is Barracellus est documentau de su Segretàriu po mesu de custus arregistrus:

1. arregistru personali de sa Cumpangia anca tocat a ddoi scriri dònna dii:
 - is trumas chi funt in servìtziu
 - is assèntzias, is mancàntzias fatas e is punitzionis donadas, inditendi is trumas;
2. arregistru de is deliberatzionis de sa Cumpangia;
3. arregistru de is assigraus cun is benis de cussus;
4. arregistru de is dannus;
5. arregistru de is denùntzias e de is averiguamentus de ofitziu;
6. arregistru de is imputus e de is arrefudus;
7. arregistru de is dannus e de is chi ant tentu dannu;
8. arregistru de is possidimentus;
9. arregistru de is udièntzias de is Barracellus;
10. arregistru de is notìficas;
11. arregistru de su giornali de càscia.

S'arregistru giornali de càscia depit portai in dònna follu su bullu de su Comunu e sa firma de su Sìndigu. A s'acabu de s'esercìtziu e apustis arrangiaus is contus, tocat a ddu lassai in s'Arciu de su Comunu.

Su 30 de làmpadas e su 31 de mesi de idas de dònna annu sa Cumpangia de is Barracellus depit presentai su torracontu de is fainas fatas, de anca si depit biri finas su fundu càscia chi ddoi est aturau. Custu torracontu bolit presentau in tres còpias, cunforma a s'art. 17, coma 6, de sa L.R. 15/7/1988 n. 25.

Impari a custu torracontu, tocat finas a presentai un'arrelata stèrria cun totu is fainas fatas e su chi nd'ant otentu.

Una còpia de su torracontu su Comunu nci-dda depit mandai a s'Assessorau Regionali cumpetenti, un'àtera abarrat in s'arcu comunali e sa de tres est po sa Cumpangia de is Barracellus etotu.

Su Sìndigu depit billai is contus e s'aministratzioni de sa Cumpangia de is Barracellus, po cussu podit, candu ddi acucat, averiguai sa càscia e castiai is arregistrus de is contus.

Su Segretàriu depit presentai a su Sìndigu is arregistrus de is Barracellus, candu si-ddu pedit, e candu acabat ddus depit lassai in s'arcu comunali.

ART. 13 Godàngiu de sa Cumpangia de is Barracellus

Is intradas de sa Cumpangia de is Barracellus funt is chi narat su coma 3 de s'art. 17 de sa L.R. 15 mesi de argiolas 1988, n. 25, est a nai custas:

1. godàngiu po ai billau sa sienda pùbrica;
2. diritus de assiguratzioni;
3. godàngiu de sa benda de su bestràmini secuestrau , comentì nant is art. 44, 45, 46, 47 de su Regio Decreto de su 14.07.1898, n. 403;
4. dinai donau de entis pùbricus o de privaus;
5. àteras intradas previdias de is normas chi nci teneus imoi.

Is fainas de Tesoreria de sa Cumpangia de is Barracellus, ddas fait s'Istitutu de crèditu chi atendit finsas sa Tesoreria de su Comunu de Mara. Is pagamentas ddas faint cun d-unu mandau firmau de su Capitanu e de su Segretàriu de sa Cumpangia.

Is godàngius bolint fatus po mesu de un'arricida de bulleta mama e filla, numerada, bullada e firmada de su Sìndigu e de su delegau de issu.

Is godàngius bolint partzius intra totu is cumponentis de sa Cumpangia, cunforma a su traballu fatu de donniunu, po calidadi e cantidadi.

A cuddu cumponenti de sa Cumpangia chi in s'esercìtziu faina no nd'at fatu, no ddi spetat perunu tanti de dinai e nimancu prèmiu. No fait a si partziri, is Barracellus, su dinai de is godàngius fatus e de su fundu de garantia de sa Cumpangia, innantis de pagai is dannus a is assigraus e innantis chi is torracontus ddus apat deliberaus sa Cumpangia e aprovaus sa Giunta Comunali. De custu fundu funt amìtias sceti anticipatzionis de càscia, torrendi-ncè-ddas, po spesas ordinàrias po su funtzionamentu de sa Cumpangia, ma no depit essi prus de su 30% de su fundu etotu. Innantis de partziri is godàngius, tocat a pagai:

- a. a su segretàriu;
- b. is spesas po certus, perìtzias e amministratzioni;
- c. totu is àteras spesas de su servìtziu de is Barracellus.

In su fundu de is spesas de funtzionamentu, funt amìtias spesixeddas po acuntu. Is certus intra su Segretàriu e sa Cumpangia, o intra sa Cumpangia etotu, po sa partzimenta de is godàngius, ddas podit aconciari su Sìndigu de manera amministrativa.

Is godàngius bolint partzius de custa manera:

- a) su 12% a su Capitanu;
- b) su 3% a is ofitzialis;
- c) su chi nd'abarrat a is cumponentis de sa Cumpangia de is Barracellus chi ant pigau parti a is trumas.

ART. 14 Arrespunsabilidadi de sa Cumpangia de is Barracellus

S'arrespunsabilidadi de sa Cumpangia de is Barracellus est sceti po furas e dannu chi no siat de fogu e balit po totu is benis assigraus e is cosas insoru, finas su bestiàmini, bastit chi siat acorrau in d-unu logu serrau o serrau a muru, cresuri, fossau o àtera serradura po no ddu ndi-ddu lassai bessiri.

Sa Cumpangia de is Barracellus no est arrespunsàbili de furas e de dannus de benis chi depiat attendi, chi ant cundennau a is chi ddus ant fatus cun sentèntzia passada in giudicau, desinunca sa Cumpangia depit arrespundi de is furas e de is dannus, mancai potzat fai balli is deretus suos cun is arrespunsàbilis. De is obrigatzionis de is assigraus sa Cumpangia arrespundit, a sa serrada de dònna esercìtziu finantziàriu cun d-unu fundu de garantia, partziu in is intradas de sa messarìtzia e is intradas de su bestiàmini, chi funt su 70% de totu is intradas. S'àteru 30%, impari a is intradas

de is puntus 3 e 4 de s'art. 12), faint parti a su fundu mìnimu po is spesas de funtzionamentu de sa Cumpangia.

ART. 15 Cumpetèntzia de su logu de sa Cumpangia de is Barracellus

Sa Cumpangia de is Barracellus fait is funtzionis suas aìnturu de su comunu cosa sua.

Podit finas fai fainas aforas de su comunu, cunforma a is articulus 3,5,10 e 30 de sa L.R. de su 15 de argiolas 1988 n. 25.

ART. 16 Averiguamentu de essi aforas de is normas

In is matèrias anca funt cumpetentis, cunforma a s'art. 3) de custu arregulàriu, su Capitanu e is Ofitzialis de sa Cumpangia de is Barracellus, podint averiguai is violatzionis de normas chi previdint santzioni amministrativa de pagamentu de dinai, conforma a s'art. 6 de sa Lei Regionali 15.07. 1988, n. 25.

Is chi funt incarrigaus, cunforma a custu articulu, de averiguai is violatzionis depint portai unu documentu, donau de su sindigu de su comunu cosa insoru, anca si depit biri chi tenint su deretu de lei a esercitai custa funzioni.

Is chi faint custu averiguamentu cunforma a custu articulu de innoi tenint is poderis de s'articulu 13, primu e segundu coma de sa lei 24.11.1981 n. 689, foras chi siant cuddus poderis stabilèssius de is leis chi nci teneus imoi.

Is violatzionis de is comas de innantis bolint averiguadas po protzessu verbali scritu in tres còpias cun:

- a) is inditus de is tempus e de su logu de s'averiguamentu;
- b) is generalidadis e sa calìfica de su chi fait su verbali e sa cumpangia sua;
- c) is generalidadis de chini est aforas de lei e candu fait, cunforma a s'art. 2 de sa lei 24.11.81 n. 689, de chini ddu depit billai;
- d) is obrigaus 'in solido', cunforma a s'art. 6 de sa lei 689/81;
- e) su contu de sa violatzioni, is tempus e su logu, de is ainas e de is mèdius manigiaus de su chi at trasgrèdiu sa lei e is generalidadis de is testimòngius de s'acontèssiu;
- f) is normas chi ant trasgrèdiu;
- g) is decreradas de su chi at trasgrèdiu;
- h) s'enti anca su chi at trasgrèdiu podit presentai scritus de defensa o documentus o pediri de essi ascurtau, cunforma a s'art. 13 de sa lei 24.11.1981 n. 689.
- i) Sa firma de su chi fait su verbali.

In is cincu diis infatu de s'acontèssiu, una còpia de su verbali depit essi intregada de su chi at averiguau, a manus o po mesu de arrecumandada cun arricida de torrada, a s'autoridadi cumpetenti, po ndi tenni un'arrelata cunforma a s'art. 17 de sa lei 24.11.1981 n. 689 e de su D.P.R. 29.7.82 n.571.

Is fasis avatantis de su protzedimentu de sanzioni, e chi est, s'opositzioni puru, ddas depit coidai sa pulima municipali cunforma a is articulus 18 e avatantis de sa lei 24.11.81 n. 689.

ART. 17 Fainas de agiudu

Sa cumpangia de is Barracellus, àinturu de su logu comunali, agiudat cun sa promotzioni contras a is fogus. Arrespentendi sa lìnìa stabilèssia de sa Ordinàntzia Regionali, fait su programma comunali, anca est sa parti faidora printzipali. Ndi at a pesai in logus pretzisus de su comunali, puntus de billai, impari a àterus sugetus pùbricus e privaus, chi si podint agatai in su comunali.

Sa cumpangia depit averiguai s'abruxamentu de is stulas. At a fai totu is fainas po defensai su comunali impari cun is àterus comunis lacanantis.

Sa Cumpangia cunforma a is printzìpius espressaus in sa L.R. 15.07.'88 n. 25 agiudat a billai su comunali po no lassai scarrigai arrefudus urbanus, spetzialis, tòssicus e nocivus; is santzionis chi si podint donai funt is chi funt previdias de sa lei po crìminis de custa genia, cunforma a is protzeduras e a is pagamentas de is normas chi teneus imoi.

ART. 18 Assiguratzioni e billa de is benis

Is meris de is benis inditaus in s'articulu 35 de su Decretu de s'Urrei de su 14 de argiolas de su 1898, n. 403, tenint s'òbrigu a pagai unu tanti a sa Cumpangia de is Barracellus chi, cunforma a s'art. 3 de custu arregulàriu, ddus depit billai e defensai.

S'assiguratzioni est obrigatòria po dònna calidadi de manìgiu de is terras, finas po pasci bestiàmini, cun is cunditzonis e is prètzius aprovas cunforma a s'art. 20 de sa L.R. N. 25 /'88, finas chi custos prètzius podint essi agiornaus cun d-una delibera de su Consillu Comunali.

Aìnturu de 30 diis de sa dii de su manifestu e de su bandu pùbricu aundi su s'indigu torrat sceda a su pòpulu de s'intrada in servitziu de sa Cumpangia, tocat a fai sciri is benis cunforma a s'art. 35 de s'arregulàriu 14.07.1898, n. 403. S'àutu ddu depint fai scritu inditendi assumancu duas coerèntzias po dònna arrogheddu de terra, cun nùmeru de mapa e follu, s'inditu giustu de su manìgiu de dònna terra, su tanti giustu de su bestiàmini e de is cussòrgias puru.

Is benis de assigurai a òbrigu a sa Cumpangia de is Barracellus funt is chi funt inditaus in s'art. 35 del R.D. 14/7/1898 n.403, aforas chi siant is ecetzonis de su de 4 comas de s'art. 4 de sa L.R. 15.07.1988 e su chi previdit su coma 6 de s'art. 4 de sa pròpiu lei regionali.

S'arresponsabilidadi de sa Cumpangia po si benis assigraus de su coma de innantis funt is chi funt inditaus in s'art. 19 de sa Lei Regionali de su 15/7/1988 n. 25.

Sa Cumpangia, spaciada sa sèmina, at a ghetai su bandu po fai sciri de s'òbrigu de denuntzias su seminau aìnturu de una certa dii e is meris aicetotu depint fai sciri a sa Cumpangia de s'incumentzu e de s'acabu de is sèminas noas chi ant a fai.

Passau chi nci est su trèmini de su coma 3 de custu articulu e finas a candu no ant a fai sa denùntzia de ofitziu, no podint essi amitiis imputus fatus de propietàrius chi no ant fatu sa denùntzia e sa Cumpangia no at a torrai sceda de is dannus finas a sa dii de s'averiguamentud e ofitziu o de sa presentada de sa denùntzia de is propietàrius.

Is propietàrius depint pagai is diritus aìnturu de su mesi de Abrili de dònna annu. Chi est e trigant a pagai, tocat a ddoi ponni s'interessu puru a tassu de lei, incumentzendi de sa dii de sa

scadèntzia. Is diritus chi no funt pagaus apustis de unu mesi de sa scadèntzia ant a essi pinnigaus po mesu de s'òutu de 'ruolo', cun totu is spesas de issu.

Po cuddus meris chi no ant a presentai denùntzia de is benis insoru, cun is trèminis e is maneras de is comas chi eus nau, ant a fai una denùntzia de ofitziu e custus no ant a tenni peruna pagamenta po is dannus. Una denùntzia frassa est candu is benis denuntzias no funt cuforma a is terras chi si possidint diaderus e su meri depit pagai una cuntraventzioni de su 20% de is diritus chi depit.

Sa Cumpangia fait sa denùntzia de ofitziu, narendiddu a s'interessau, podendi intrai in cuddus possidimentus anca nc'at dudas po su chi est sa giustesa de su dannu e po fai totu is averiguamentus chi serbint.

Sa denùntzia tocat a dda fai sciri a s'interessau a incuru e cun is spesas pagadas de sa Cumpangia de is Barracellus. Contris a s'averiguamentu de ofitziu fait a fari arrecursu a sa Giunta de su Comunu de sa Cumpangia ànturu de dexi diis de s'averiguamentu etotu.

Fait a dda fai cumenti a no dda fai, sa denùntzia sa denùntzia po is cungiaus cunforma a s'art. 8 de sa lei 02.08.1967 n.799 e in is dominàrius anca ddoi siat unu guardianu fissu inguni.

Fait a dda fai cumenti a no dda fai, cun sa Cumpangia de is Barracellus, s'assiguratzioni de is animalis chi no funt in s'art. 35 de su Decretu Arriali de su 14 de argiolas de su 1898 n. 403.

S'òbrigu de su primu coma de custu artìculu, balit finsas po is terras donadas in gestioni cunforma a s'art. 51 de sa L. R. 28 abrili 1978, n. 32, e finsas po is chi tenint sa cuncessioni de benis pùbricus in sa terra insoru e postus in is matèrias de s'art. 2, primu coma, de sa L. R. 15 argiolas 1988, n. 25.

Is àterus benis, pùbricus o privaus, chi no faint parti a is inditus de su primu e de su segundu coma de s'art. 4 de sa lei chi eus nau, podint essi donaus a billai a sa Cumpangia de is Barracellus po mesu de una cunventzioni intra is partis interessadas.

Is benis de assigurai a sa Cumpangia de is Barracellus funt is chi funt inditaus in s'art. 35 de su R.D. 14/7/1898 n. 403, foras chi siant is ecetzionis de su de 4 comas de s'art. 4 de sa L.R. 15.07.1988 e sa facultativa prevìdia de su coma 6 de s'art. 4 de sa pròpiu lei regionali.

A prus de is benis inditaus in s'art. 35 de su R.D. 14.07.1898 n. 403 podint essi donaus a billai a sa Cumpangia, finas dominàrius pùbricus o privaus postus ànturu de su centru de sa bidda, paghendi unu cumpensu de stabilessi cun su meri.

Is meris, chi bolint, podint finas donai a billai a sa Cumpangia stabilimentus industriali o artisanalis postus in d-unu logu calisiat ànturu de su comunali, domus de su sartu, domus de bivi, paghendi unu tanti cuncordendi-ddu is partis e faendi-ndi unu verbali su Segretàriu de sa Cumpangia, firmau de is partis e de su Capitanu.

Su dinai incasciau de s'assiguratzioni de is benis chi eus nau in is primus duus comas de custu artìculu depint tenni su fundu de garantzia de su 30% assumancu.

S'arresponsabilidadi de sa Cumpangia po is benis assigoraus de su coma de innantis, funt is chi funt inditadas in s'art. 19 de sa Lei Regionali 15/7/1988 n. 25.

ART. 19 Arricimentu de su pùbricu de su Capitanu

Su Capitanu tenit a òbrigu de fai connosci a su pùbricu su tempus e su logu anca arricit is denùntzias e finas s'oràriu de s'ofitziu.

ART. 20 Trèminis de sa denùntzia

Su trèmini de sa denùntzia de furas e de dannus depint essi presentaus de is assiguraus in forma scritta e su prus a lestru chi fait e cumentisiat màssimu ànturu de is 5 diis de s'acadessimentu.

Deghinou sa Cumpangia no tenit òbrigu a pagamenti peruna. E perou tenit sa possibilidadi de pagai calincuna cosa de dannus denuntziaus ànturu de is 10 diis.

ART. 21 Arregistratzioni de su Segretàriu

Su Segretàriu arregistrat is imputus e donat un'arricida a su chi at denuntziau.

ART. 22 Prèmius de assiguratzioni

Po totu is benis chi depit arrespundi sa cumpangia, tocat a ddi pagai unu prèmiu de assiguratzioni; totu su chi ddoi ponint in d-una terra tenit tassatzioni dòpia, est a nai ca, cunforma a is tantis de oi, unu prèmiu po dònna cosa. Chi in d-unu olivàriu ddoi ponint patatas, tocat a pagai unu tanti po s'olivàriu e unu tanti po is patatas. Su prèmiu est stabilèssiu de una deliberatzioni de su C.C. cunforma a custas boxis:

Tipu de cultura	Prèmiu De Assiguratzioni €/Ha po Annu (a) 5% de b)	Valori Assiguru €/Ha po Annu b)
Pasci	3,00	60,00
Foràgiu	5,00	100,00
Ateras culturas de erba	4,00	80,00
Bingia	10,00	200,00
Bingia po mesa	35,00	700,00
Frutetu	23,00	460,00
Padenti	10,00	200,00
Olivàriu	14,00	280,00
Trigu	5,00	100,00
Òrgiu	4,00	80,00
Avena	4,00	80,00
Beda	9,00	180,00
Cixirianu	7,00	140,00
Tomata	13,00	260,00
Patata	13,00	260,00
Sindria	13,00	260,00
Meloni	13,00	260,00
Cibudda	13,00	260,00
Canciofa	13,00	260,00
Atera ortalitzia	13,00	260,00

Sa cumpangia podit assigurai domus o bestiàmini o àterus benis de su terrinu, cuncordendi sa cosa cun s'assiguru.

Po podi fai custa assiguratzioni, s'interessau depit presentai sa domanda po su billamentu e finas narendi cali est sa propiedadi, is benis e su bestiàmini e su valori cosa insoru, faendi una decrarada chi arremprasit s'antu de notoriedadi, cunforma a su D.P.R. 445/2000.

Custa documentatzioni depit lompi innantis de su 30 de mesi de ladàmini de s'annu prima de su chi bolit assigurai.

Chi nci est unu tanti de demandas po incumentzai su servìtziu de billamenti, allogamentu e assiguratzioni de is benis de interessai a sa cumpangia, at a inghitzai su procedimenti po cumprendi beni is costus e duncas su tanti de donai a sa cumpangia po su servìtziu.

Su tanti mìnimu de demandas bolit nai a assigurai assumancu 10 siendas cun dominàrius o prus de unu, 3000 pegus de brebeis, 250 procus, 100 pegus mannus.

ART. 23 Prètzius e pagas

Su consillu comunali stabilessit dònna tres annus, intèndiu su comitau 'comprensoriale agricole' de s'art. 8 de sa lei regionali 22.03.1979 n. 19, su tanti de is pagas e de is diritus de assiguratzioni chi spetant a sa Cumpangia e finas s'indennidadi de is dannus. Po sa paga de su tanti chi spetat e po is diritus de assiguratzioni tocat a apricai is dispositzionis de s'art. 48 de su R.D. 14.07.1898 n. 403, giai ca funt cunforma a is normas chi teneus imoi po su chi est tributus comunalis.

Su tanti de is pagamentas e de is diritus de assiguratzioni de donai a sa Cumpangia de is Barracellus po dònna pegus assigurau est su 5% de su valori suu.

Su tanti si podit donai totu paris candu si fait s'assiguratzioni o in duas bortas, sa primu candu si fait s'assiguratzioni e sa segundu a is ses mesis.

ART. 24 Furas e dannus

Sa cumpangia at a arrespundi de is furas e de is dannus a is terrinus assigoraus.

Sa denùntzia de sa fura e de is dannus tentus depit essi presentada scritta e fata luegus e ànturu de is cinqu diis de s'averiguada de su chi at tentu su dannu.

Chi no fait aici, sa Cumpangia no tenit perunu òbrigu de pagai.

Su segretàriu arregistrat is imputus e donat un'arricida a su chi at denuntziau.

Po chi sa cumpangia depat pagai is dannus stabilèssius de s'arregulàriu po mànigas de trigu, òrgiu, faa, cìxiri, prisuci, piseddu, gentilla e axina, su meri depit fai una denùntzia speciali cumentu at messau o incungiau, narendi su tanti e aundi s'agatat. Sa cumpangia podit averiguai sa giustesa de sa denùntzia. Su tempus chi custus podint abarrai in su terrinu no podit essi de prus de custas diis: 5 diis po su trigu, òrgiu, cìxiri, prisuci, piseddu, gentilla e axina; 20 diis po sa faa.

Sa cumpangia arrespundit de sa linna segada in is terras denuntziadas e in is bìngias sceti chi faint sa denùntzia cumentu narat su coma de innantis; s'arrespunsabilidadi de sa cumpangia balit 10 diis po sa linna amuntonada e 20 diis po sa cotzina.

Is meris, po chi sa cumpangia arrespundat de su dannu a is domus de sartu, gecas o tancaduras de ferru, candu funt denuntziendi depint fai fai una peritzia a fini a fini, paghendi issus e cun d-unu tènnicu sceberau impari a sa Cumpangia etotu.

Sa Cumpangia no at a pagai is dannus a cuddus meris chi po nexi cosa insoru no ndi arregollint is frutus cotus e chi nci lassant passai custas diis:

Po faa, òrgiu, prisuci e gentilla, su 30 de làmpadas

Po trigu, cixiri, piseddu, su 31 de argiolas

Po sa mèndula, su 15 de mesi de ladàmini

Po s'àxina, su 20 de donniasantu

Po figu morisca, fasolu, tomata, su 30 de donniasantu

Po s'olia, su 31 de martzu

Po àrangiu, limoni etc. su 30 de maju.

Foras chi siant cuddas ecetzionis cuncordadas de s'assigrau e de sa Cumpangia.

Est proibiu a intrai, chentza de arrexoni, in is terras allenas de calisiat genia. A su pròpiu, est proibiu a totus a ndi boddiri de is matas e de is bìngias allenas dònna genia de fruta o àxina; est finas proibiu, prima de sa spaciai sa binnenna, a ndi boddiri gurdonis o sciscilloni.

Is chi ddu faint ndi podint aciapai una santzioni amministrativa de 25.000 èurus o finas un'atzioni penali.

Tenint santzioni amministrativa finas is infratzionis de custas dispositzionis:

- A. Is chi ant a cassai faendi dannus de dònna genia, a tirai erba o àtera cosa in terras allenas ndi aciapant una santzioni de 25 èurus a prus de torrai a pagai su dannu fatu.
- B. Is chi a tratori o àteru mèdiu mecànicu ant a essi cassaus passendi in terras allenas chi no nci at abisòngiu pretzisu po depi lompi a is terras de traballai a tratori. Su tratorista depit sceberai su tretu prus crutzu e lòmpiu chi est a sa terra dda depit traballai chentza de nci sartai su trèmini ca chi ddu fait ndi podint aciapai una santzioni de 30 èurus a prus de torrai a pagai su dannu fatu.

Est proibiu a lassai intrai su bestiàmini aresti a pasci in is camineras de is bìngias chi tenint custa serbidudi. Is chi trasgredint ndi aciapant una santzioni de 50 èurus o finas un'atzioni penali.

ART. 25 Indennidadi

Is indennidadi chi sa Cumpangia depit pagai a is assigraus ant a essi pagadas diaici: po fura o dannu de is terras, su tanti assigrau at a essi pagau a sa serrada de dònna esercitziu finantziàriu.

S'arrembursu de s'indennizu chi donat sa Cumpangia tenit una franchìgia de 25 èurus, duncas po is dannus de prus pagu de custu tanti, no donant nudda, po is dannus prus matucus ant a donai su tanti chi torrat cun sa perìtzia fata, bogau su tanti de sa franchìgia.

ART. 26 Perìtzia de is dannus

Po sa perìtzia e po sa stiba de is dannus a is benis assigraus est prevèdiu a circai a unu spertu, unu peparti.

Sa stiba cuncordada stabilessit su tanti de su dannu.

Is spesas de sa perìtzia funt a càrrigu de is partis.

Chi est e no si ponint de acòrdiu e is partis ddu pedint impari, fait a circai a un'albitru po detzidi de manera giusta sa chistioni, assistendiddu e agiudendiddu duus peritus nomenaus de is duas partis.

A s'albitru ddu nomenat su Consillu Comunali apustis de una proposta de sa Giunta, abarrat in càrriga po totu sa durada de sa Cumpangia e podit essi torrau a nomenai.

ART. 27 Calidadi de is albitrus

Is calidadi chi pedint po essi nomenaus albitrus funt is chi inditat s'art. 21 de sa L.R. 25 de su 15.07.1988, màssimu:

- a) A tenni is calidadi po essi eligiu a Consilleri Comunali;
- b) A tenni residèntzia e dimora in su comunu de Mara;
- c) A essi personi bona a atendi a sa faina de manera d'innia po is calidadi suas connotas de onestadi, firmesa e onori.

Po arrangiai custas chistionis, s'albitru est assistiu e agiudau de is duus peritus chi ant nomenau is duas partis.

A s'albitru ddi spetant custas indennidadi, chi is duas partis depint partziri in partis ogualis:

po d'innia perìtzia 35,00 €;

po indennidadi de viagiu a kilometru, 1/5 de su costu a lituru de sa nàfata.

ART. 28 Prètzus - bestiàmini tenturau

Sa Cumpangia agatendi bestiàmini chentza de meri in terras allenas, ddu depit pinnigai e billai po no fai dannu a àtera genti e in su pròpiu tempus, ddu depint finas nai a is meris.

Po su bestiàmini tenturau su meri at a pagai sa Cumpangia po is diritus de tentura.

De 25 a 500 € – finsas a 50 pegus de brebei o de craba, pascendi chentza de 'frutus pendi-pendi';

De 50 a 500 € – de 51 a 150 pegus de brebei o de craba, pascendi chentza de 'frutus pendi-pendi';

De 75 a 500 € – prus de 151 pegus de brebei o de craba, pascendi chentza de 'frutus pendi-pendi';

De 25 a 500 € – finsas a 10 pegus de ullu, cuaddus o procus pascendi chentza de 'frutus pendi-pendi';

De 50 a 500 € – de 11 a 20 pegus de ullu, cuaddus o procus pascendi chentza de 'frutus pendi-pendi';

De 75 a 500 € – prus de 21 pegus de ullu, cuaddus o procus pascendi chentza de 'frutus pendi-pendi';

De 35 a 500 € - finsas a 50 pegus de brebei o de craba, pascendi in logu serrau o cun 'frutus pendi-pendi';

De 40 a 500 € - de 51 a 150 pegus de brebei o de craba, pascendi in logu serrau o cun 'frutus pendi-pendi';

De 60 a 500 € – prus de 151 pegus de brebei o de craba, pascendi in logu serrau o cun 'frutus pendi-pendi';

De 30 a 500 € – finsas a 10 pegus de ullu, cuaddus o procus pascendi in logu serrau o cun 'frutus pendi-pendi';

De 60 a 500 € – de 11 a 20 pegus de ullu, cuaddus o procus pascendi in logu serrau o cun ‘frutus pendi-pendi’;

De 80 a 500 € – prus de 21 pegus de ullu, cuaddus o procus pascendi in logu serrau o cun ‘frutus pendi-pendi’;

Is diritus de tentura depint essi pagaus innantis e mai apustis de is 30 diis de sa notìfica.

Chi est e no pagant, su tanti de pagai benit a essi a duas bortas.

A prus de is diritus de tentura a sa Cumpangia ddi spetant, po su bestiàmini tenturau e billau, custas spesas de allogamentu e mantenimentu:

pegus de ullu, cuaddus e procus 5,00 € a sa dii po dònna pegus;

brebeis o crabas 2,00 € a sa dii po dònna pegus;

a prus de s’indennidadi de acumpangiamentu de 10 € po dònna ora de assistèntzia de dònna barracellu tenturanti.

Totu is diritus de tentura bolint partzius intra is cumponentis de sa Cumpangia.

Sa Cumpangia chi allogat e billat cunforma a s’art. m. 28, est obrigada, chi ddu connoscit, a ddu nai a su meri, siat po ndi torrai a pinnigai su bestiàmini e siat po depi pagai sa contraventzioni. Chi no fait, insandus ddu nant a s’autoridadi cumpetenti.

Su meri chi no ndi pinnigat su bestiàmini ànturu de is 24 oras de sa notìfica, depit pagai a sa Cumpangia, sa santzioni de su 50% de is diritus stabilèssius in is comas de innantis.

Su pastori pascendi bestiàmini depit, chi si ddu pedit sa Cumpangia, fai a biri a is barracellus sa lista de is terrinus de pasci, firmaus de sa Cumpangia chi depit allogai in ufitziu is permissus de su meri.

Chi est pascendi a fura o si pensat chi siat pascendi a fura, su bestiàmini bolit tenturau e tocat a ddu nai a su meri de su terrinu.

Is permissus scritus de is meris depint inditai de manera pretzisa su logu, sa mannària, is lacanantis, sa calidadi de sa terra de pasci e finas sa dii de incumentzu e de acabu de sa cuncessioni.

Cumentisiat chi nci at bestiàmini o unu dannu calisiat in is propiedadis assiguradas, sa Cumpangia ddu depit sèmpiri nai a su meri de su terrinu, ànturu de is tres diis de candu dd’ant averiguau.

Sa Cumpangia depit finas scriri a su Comunu de totu is dannus fatus a is propiedadis comunalis e de is infratzionis a ordinàntzias e arregulàrius comunalis.

Is pastoris funt obrigaus a fai sciri a sa Cumpangia is logus anca depint pasci su bestiàmini e candu si transint a àteru logu chi no est acanta.

Su pastori chi agatant chentza de billetu de passàgiu o chi no dd’at nau a sa Cumpangia de is Barracellus de su transimentu de su bestiàmini, at a essi puniu cun d-una santzioni:

o De 25 a 500 € - finsas a 50 pegus de brebei o craba,

o De 50 a 500 € - de 51 a 150 pegus de brebei o craba,

o Dae 75 a 500 € – prus de 151 pegus de brebei o craba,

o De 25 a 500 € – finsas a 10 pegus de ullu, cuaddus o procus;

- o De 50 a 500 € – de 11 a 20 pegus de ullu, cuaddus o procus;
- o De 75 a 500 € – prus de 21 pegus de ullu, cuaddus o procus;

Chi s'infrazzioni dda faint a de noti, sa santzioni chi eus nau benit a essi a duas bortas.

Su Capitanu podit pediri a is meris o a is pastoris de bestiàmini foresu una cautzioni a garantzia de dannus chi podint incapitai, po unu tanti de 1 € po pegus piticu e 5 € po pegus matucu.

Custu tanti at a essi torrau a sa bogada de su bestiàmini de su sartu de su comunu, apustis de essi averiguau chi no apant fatu dannu.

Su segretàriu at a arriciri sa denùntzia de is terras o de su bestiàmini cunforma a s'art. 23 e at a donai a dònna denuntzianti una politza firmada de issu, cun sa dii de sa denùntzia scritta, de totu is benis denuntzias e de totu is afoghìgius pagaus e finas s'inditu de s'arregistratzioni fata.

Sa Cumpangia podit, in s'esercìtziu cosa sua, torrai a castiai is denùntzias fatas e tzerriai a is denuntziantis a ddas arrangiai chi ddoi at fartas o cosa pagu cunforma.

Chi su denuntzianti chi ant tzerriau arrangiat sa denùntzia ànturu de is cinco diis, at a pagai una penali de su 10% cunforma a su tanti normali e po is fartas sceti.

Chi no est aici, a sa denùntzia 'de retifica' de ofitziu tocat a nci aciungi una penali de duas bortas su prèmiu e po is fartas sceti.

ART. 29 infratzionis e santzionis disciplinaris

Is Barracellus chi no faint su doveri cosa insoru, ndi podint aciapai custas santzionis:

- a) S'amonitzioni po una cumissa mancada, cun s'amonestu de no ddoi torrai a arrui;
- b) Santzioni de dinai;
- c) Sa firmada de su servìtziu e duncas a nci perdi su diritu a su tanti de is ùtilis de sa Cumpangia;
- d) Sa bogada de sa Cumpangia.

S'amonestu ddu fait su Capitanu a boxi po fartixeddas piticas. Sa santzioni in dinai, de 50 €, dda donat su Capitanu po curpa matuca in su servìtziu, po cumportamentu sballiau cun is superioris, po essi mancau in su segretu de ofitziu, po cumportamentu fora de onori. Sa frimada dda proponit su Capitanu e est deliberada de sa Giunta Comunali, intèndiu s'interessau.

Custu bolit nai a nci-ddu bogai de su servìtziu po unu mesi assumancu ma po no prus de ses mesis, candu ddoi at santzioni in dinai e is infratzionis funt gravis meda, est a nai a ofendi a is superioris, a imperai s'ofitziu po cosa privada, a essi lassau su servìtziu, a essi scoviau segretu de ofitziu chi nd'at betiu dannu meda. Sa bogada dda depit arriciri sa Giunta Comunali po mesu de sa proposta arrexonada de su Capitanu, apustis de ai intèndiu a s'interessau.

Sa bogada bolit nai a nci perdi totu is intradas chi spetant a su chi nci ant bogau. Contris a is atzionis disciplinaris de sa litera b) de su primu coma de custu artìculu, fait a fai arrecursu innantis de is 30 diis de sa notifica, a sa Giunta Comunali chi depit detzidi prima de is 60 diis, apustis de ai intèndiu a s'interessau. Contris a is atzionis disciplinaris de is literas c) e d) de su primu coma de custu artìculu, fait a fai arrecursu innantis de is 30 diis de sa notifica, a su Consillu Comunali chi depit detzidi prima de is 60 diis.

ART. 30 Suspensioni de seguresa

Is cumponentis de sa Cumpangia de is Barracellus chi tenint prutzessu penali gravi meda, podint essi suspèndius po seguresa de su servìtziu, cun d-unu provedimentu de sa Giunta comunali o bogaus de unu totu chi ant tentu cundenna. Sa suspensioni est obrigatòria candu chi ddis ant intregau òrdini de arrestu.

ART. 31 Provedimentus disciprinaris po su Capitanu

Su Capitanu chi fait infratzionis cunforma a s'artìculu 15) podit essi suspèndiu o in is ocasionis prus gravis bogau cun deliberatzioni de su Consillu Comunali, intèdiu s'interessau. Sa suspensioni e sa bogada funtzionant cun is maneras e is tempus stabilèssius po is Barracellus.

ART. 32 Transimentu

A is arregulàrius de is Barracellus tocat a ddis apricai is normas prevìdias po is arregulàrius comunalis e su dispostu de su segundu coma de s'art. 1 de su D.P.R. 22.05.1975 n. 480. Una còpia de cussus, cun is cambiamentas e is aciuntas e finas una còpia de is àutus de nòmena de su Capitanu, sa fundada e is cambiamentas de sa Cumpangia, bolint intregaus a s'Assessori regionali cumpetenti po cosa de pulima de su logu, innantis de is cùindixi diis avantantis a su chi ant incumentzau a balli.

Furriau in sardu de su Portalitu de sa Lìngua Sarda de su Comunu de Mara